



19. december 2011

Inatsisartut Suleriaasianni § 37 naapertorlugu Naalakkersuisunut apeqquq imaattoq matumuuna saqqummiuppara:

Naalakkersuisunut apeqquq

1. Naalakkersuisut qinnuigineqarput Sorlak attavigeqqullugu qinnuteqarnermut, aalajangiinnermut, agguaanermut, ilaasortat amerlassusaat kiisalu ukiuni 2008-mi, 2009-mi 2010-milu politikikkut suliniaqatigiiffiit Siumup Inuusuttaanut, Inuit Ataqtigiit Inuusuttaanut, Demokraatit Inuusuttaanut kiisalu Atassutip Inuusuttaanut aningaasat tunniunneqartarsimasut pillugit paasissutissanik pissarsiumalluni.

(Inatsisartunut ilaasortaq Andreas Uldum, Demokraatit)

Tungavilersuut

Demokraatinut pingaaruteqarpoq, politikikkut suliniaqatigiiffiit inuusuttaasa siuttuunissaat, aningaasatigut tapiissutit eqqarsaatigalugit eqqortumik iliornissaq eqqarsaatigalugu. Tamatumunnga soorunami pissutaavoq, siunissami nunatsinni aalajangiisalerumaartussat politikikkut inuusuttut suliniaqatigiiffianiimmata.

Neriuppunga upperalugulu politikikkut inuusuttut suliniaqatigiiffii eqqortumik ingerlatsut, taamaakkaluartorli atortussanik perusuppunga, tamanna nammineq misissorumallugu.

Taamatut kissaateqarninnut pissutaavoq suliaq ingerlasoq, tassani Siumup Inuusuttaasa uppersarsarpaat Sara Olsvig ulloq 23. juni 2009-mi inuusuttut suliniaqatigiiffianiit partiimut ilaasortanngorsimasoq, taamaasillunilu – Siumup Inuusuttai naapertorlugit – aamma inuusuttut suliniaqatigiiffianut. 2010-mi Sara Olsvig ilaasortaanermut akiliinngitsoorpoq. Siumup Inuusuttaani siulittaasoq Kaalinnguaq Siegstad tusagassiutinut nalunaarummini ulloq 27. oktober 2011 allappoq, Siumup malittarisassai naapertorlugit ilaasortaaginnartoqartartoq, partii ilaasortaajunnaarnermut nalunaarummik tigusaqarnissaata tungaanut. Ilaasortanik taamatut tigumminiinnartarneq uanga isumaga naapertorlugu torinngilaq, isumaqarama, kattuffimmi taamaallaat ilaasortaasoqarsinnaasoq ilaasortaanermut akiliisimangaanni.



Tamanna tunngavigalugu soqutigintartippa misissussallugu, Siumup Inuusuttai tapiissutinik pissarsisarsimansoq, ilaasortat allattorsimaffiini ilaasortat akiliisimanngitsut ilanngullugit, taamattu pisoqarsimassappat uanga isumaga naapertorlugu ilaasortatut isigineqarsinnaangitsut ilanngullugit tapisissutigineqarsimassapput.

Manna saaffiginnissut aqutigalugu Naalakkersuisunut politikkikkut suliniaqatigiiffiit inuusuttaanit allanik atortussanik piimallunga saaffiginninninnut pissutaavoq, pingaartikkakku taakku kattuffiit iluamik ingerlatsinersut paasissaallugu.

Naggasiullugu innersuussutigissavara Tipsernermit lottornermillu iluanaarutinit agguaassisarneq pillugu Inatsisartut inatsisaanni nr. 7-mi, 1. juni 2006-imeersumi § 6, tak. Inatsisartut inatsisaanni nr. 10-mi, 22. november 2011-meersumi § 5. Tassani allaqqavoq, Naalakkersuisut qinnuteqarnerat tunngavigalugu Sorlak pisussaasoq paasissutissanik tamakkiisunik Naalakkersuisunut nassiussinissaminut. Tamannarpiarlu tunngavigalugu Naalakkersuisut qinnuigaakka paasissutissanik tamakkiisunik piniaqqullugu.

Nalunngilara paasissutissat Sorlammeersut pissarsiariniarnerat ullut sulliviit nalinnaasut qulit sinnerlugit sivissuseqarumaartoq. Tamanna tunngavigalugu Naalakkersuisut qinnuigissavakka ullut sulliviit nalinnaasut qulit iluanni taggeqqullugu qaqugu atortussat pissarsiareersimanissaat naatsorsuutigineraat, taamaasillunga tamakkiisumik akineqarsinnaaniassagama.